

**Immap naasuinik tunisassiornerup pilersinnissaanut annertusarnissaanullu tunngatillugu misileraanernut aningaasaliissutaasartussat siunertamut tulluarnerusumik qanoq ilusilerneqarsinnaanerit atuutsinneqarsinnaanerallu pilugit nassuiaammik Naalakkersuisut saqqummeeqqullugit peqquneqarnissaannik Inatsisartut aalajangiiffigisassaattut siunnersuut. Ilaatigut kommunit inussutissarsiortullu misilittagaat nassuiaammut ilaatinneqassapput. Nassuiaat UKA2021 sioqqullugu Inatsisartunut agguanneqassaaq, taamaalilluni nassuiaammi inerniliunneqartut AIS2022-ip suliarineranut ilanngunneqarniassammata (Partii Naleraq, Inatsisartuni ilaasortat)**

### **Akissutitut allakkiaq**

(Inuussutissarsiornermut Aatsitassanullu Naalakkersuisoq)

### **Aappassaaneerera**

Naalakkersuisut sinnerlugit Inuussutissarsiornermut Aatsitassanullu Ataatsimiititaliaq siunnersuummik suliaqarnerannut atatillugu qutsavigerusuppara.

Inuussutissarsiornermut Aatsitassanullu Ataatsimiititaliap siunnersuut itigartitsissutigisassatut inassutigigaa malugineqassaaq.

Immap naasuisa inuussutissarsiutaanerisa ineriartorteqqinnissaanik tapersersuisussatut suliaqartunit amerlanernit misilittakkanik katersuinerit piukkunnaateqarsinnaanerit ataatsimiititaliap ilaatigut oqaatigaa. Taamaattumik soqutigisaqaqatigiinnik tamanik kattussuutsinissamik suliaqarneq Naalakkersuisut ingerlateqqinniarpaat, taamaalilluta ataatsimoorluta immap naasuinik inuussutissarsiorkut ineriartortissinnaassagatsigu.

Inuussutissarsiorkut suliniutinut – assersuutigalugu immap naasuinik suliniutinut – qanoq ililluni siunnersorneqarnermik tapiissutinillu pissarsisarnissap erseqqinnerulerlunilu paasiuminarnernissaa ataatsimiititaliap akerliusoqarani takorusukkaa Naalakkersuisut maluginiarpaat. Tamanna ingammik illoqarfiit anginerusut avataanni innuttaasuni taamaallaat kalaallisut oqaatsinik atuisunut attuumassuteqartillugu.

Naalakkersuisut taamaattumik kaammattuummik malinnikkusupput, aammalu Innovation Greenlandimut saaffiginninniarpit tapiissuteqartarnermut aaqqiissutinut pisariunnginnerusumik aqutsisarnermut ilitsersuummik suliaqarnerminni maannakkut suliap sakkortusarnissaa kaammattuutiginiarlugu. Tassaassaaq piviusutut suliarisaq, inuussutissarsiorkut suliniutiminnut qanoq ilillutik tapiissutinik ilitsersuinernillu innuttaasunut pisariillisaallunilu erseqqissaasusaaq. Naalakkersuisut aamma tamatuminnga ingerlariaqqinnissamut ikiorsiissutaasinnaasunik siunnersuutitsialannut tamatigut ammasuupput.

Taamatut oqaaseqarnikkut siunnersuut itigartitsissutigineqarpoq.